

Téerëe bíníyú unna won Pool Tít dë Kúnsëe

Yee daa unna bíní Pool Tít dë. Di fi Tít, ñani Pool daa na húmú boku légéyíri Koope. Di húmú géerté habra'i Pool lool bee laha' Pool tolof-tolof a bëy Korente ra (Saame 2 Korente 12.18). Na bíní Pool Tít unni yee ra nék, ðeef ði fi Tít ín Keret na habra' bëy ílí jaŋaa ðee nay waa tilée rë (1.5).

Filib unna ñal, Pool líkinté Tít biti ði lah fayda níi ow ñan ðii heef (2.7-8, 15). Tít waŋti yeeddë bëy ílí jaŋii Keret ðee ñeya' Koope Ruuh-Pesëŋ a Yéésú-Kiristaa sëmlë'té yen bakaadfi yen ra (2.4-6 ; 4.6-8). Di nahte ri woni bëewë di nay sehúu ayi Kiristaa (2.11-13).

Pool wonte ri :

- yii lenke di waŋti man njiit jaŋi (1.5-9),
- yii lenke yeeddëh yí paŋŋah ya (1.10-16),
- yii lenke líkíní ñaha ya a bitiffa (2.2-3),
- yii lenke líkíní wahambaane ya a jéegí teŋ-teba (2.4-8),
- a yii lenke líkíní bëewë habu ñaam ra (2.9-10).

Bëyi fí jaŋi téeríi bee bëeŋ ay ot biti ow fi ow bëeŋ waŋtee súgëh íñi bossi ëldúnë, ði pes pesaŋ has Kiristaa na.

Wodohi Pool Tít

¹⁻⁴ Do fi Tít, ðo fa haba' mi koy so' kah-kah filib ngémë boku yen ða, so' mi Pool, so' mi

súrgíi Koope a apootari Yéésú-Kiristaa, daa mi na wodoh ro. Mi nahu habra'i bēewē Koope tanis wa ra wa ham ngémē, mi teeb wa kaaf ka, kaaf ka ñéerē' a pesadi bēewí pokuute Koope na. Hen daa raa, ay waa wēer biti wa ay haal pesa na dúméh, gapa' Koope deef ëldúnē sakuy doom ra, dī fa na woneh yii lahay ra. Laha' wahtaa faha' ri ra, dī fi Koope Sëmléhí yen teeba'te yii lenke pesi baa fliib Unee ke ri túuy dī sē' waare ra. Kon book Tít, Baap-Koo a Yéésú-Kiristaa Sëmléhí yen líhún dē mal, on dō jaamma !

Dee wadti man njíit jani ra

⁵ So' nék, fu ot mi hel ro Keret, faha'i biti fu lúsíí yee húmú tas légyéë rē níi ñña béeb tíkēh waal, te gin fi gin béeb fu fal na i njíit jani ti di naha' mi ro ri nen.

⁶ Njíit jani nék, wadti hena bëyí lahay yii wonun sun fi, teem belebi na kut, koyya yahun bēewí gémúté Kiristaa*, ow ban waa haba' walankaane, wa hen bēewí koruute.

⁷ Njíit jani daa na tooppitoh yii lenke ñni Koope, daa tah dī wadti hen bëyí lahay yii wonun sun fi. Di waray hen bëyí gaan-gaanla' gaan-gaanloo, waray hen bëyí keeña wuneh, waray hen bëyí han kep daa afa, waray hen bëyí faha'te haa', waray hen bëyí paga' yii waray, saame na alal.

⁸ Di wadti hena bëyí mínté haneel, faha' yin wun, dī hen bëyí teeyte, júbpé, dī hen bëyí lante te mín ham afi.

* **1:6 1:6** ñéewí gémúté Kiristaa :Lahte bēewí habuu ri dēh : ñéewí mitute lekoh.

⁹ Di wadti hena bal bëyí pokohte híin Una mit lekoh ra ti di yeeddúu rí nen. Hen daa raa, dī ay mín yeedíd' bëewí kayya kaah, dī on wa doole, teeb bëewë na haa'uu ri iña na yeeddë' rí rë biti wa homuy kaah.

Yeeddëh yí padɗah ya

¹⁰ Caakute bëewí fí yúhté biti faaliyuuy yii na wonu wa, níi luka' yëwúɗɗë haalu ngémë rë, wa anti homuu daaha nofee bëewë a wonni lahay njiriñña waa na.

¹¹ Lah feheye níi wa nís wonni yaa búkkí wë, ndah wa powute faam caak. Wa yeeddúu iñi yéŋké biti waray, wa saame na alal.

¹² Húmú lahte bëyí dék Keret, bi bëy gin wa húmú habuu ri yonente. Bëyí baa húmú won tih : « Bëy Keret mësúu hen i feloh, wa bëewí bosute ti rabba luufa nen, wa bëewí ɗapasute te kamute »,

¹³ te yee won dī baa ra kaah. Yii baa daa tah lah wonee bëewë në a unni diŋke nda wa lah ngémí hiinté.

¹⁴ Wa banuy síkírëh yëwúɗɗë na wonu wonni saku sako ra, wa banuy ñee iña na túuyú wë bëewí súugúuté kaaf ka.

¹⁵ Bëewí ladute, yin na sobeyeh waa na. Bëewí laduy nék, yee gémúy rë, iña béeb sobeya' sobeyoo waa na ndah níbbí wë na ladeh, wa na lëhíh jom.

¹⁶ Wa digiruu biti wa yúhú Koope, te pagadfi wa teeba'te biti wa wonuy yin dīi na. Wa bëewí bosute bosu woneeh, faaliyuuy yii na wonu wa te wa míníh paŋ dara yii wunte.

2

Di wadti man bëyi gémpé

¹ Do fi Tít nék, lah yeeddé bëewë iñi ñéerë' kaah.

² Lah wone baha ya biti wa hen bëewí teeyute, bëewí mitu yed' cér, bëewí mínú ham affi wa, wa ham ngémë híin, wa faha' ow, wa mín múñ.

³ Ti daaha nen, wone bitiffa biti wa pes pesi neba'te Koope, wa banti won bos sun ow, wa banti hen bëewí han kep daa affi wa te wa yeeddéé yin wun.

⁴ Wa yeeddún jéegí teb-teba faha'i yaalli wa a koyyi wa,

⁵ wa won wa mín ham affi wa, wa lan íllí Koope, wa tooppitoh faammí wa, wa baah, wa on yaalli wa cér. Hen daa raa, bos ii wonu sun fi Un Koope.

⁶ Ti daaha nen bal, lah wone wahambaane ya biti wa hen bëewí mínú ham affi wa.

⁷ Do fi baa nék, lah page yin wun di yii mín díi hen béeb ndín, bëewë yeele doo na wa ñee kottu. Fu yahti yeeddë' rëe, lah núhée rí keeñu ñéerë' a fayda,

⁸ fu ñee kaaf ka toŋ nda ow laheh dara yii wona ri na. Hen daa raa, kaa'oh yi yen ii mín won bos sun fi yen. Tígí daaha, wa ay sopoh.

⁹ Lah wone bëewë habu ñaam ra bal biti wa on kélfë yí wë cér di yii mín díi hen béeb. Wa paŋ yee neba' wa ra, banti capa' a wa

¹⁰ mbée lohre wa. Wa henun bëewí mitute lekoh faraah. Hen daa raa, wa ay tah bëewë on iña na yeeddúu yen sun fi Koope, dí fi Sëmlëhí yen da cér.

Di tosa' yen Yéésú

¹¹ Di fi Koope teeɓpe bëewë biti onte wa mal. Mali baa daa kúnsíɗ wë béeb íl múcée,

¹² yëedíɗté yen yeris kaañ Koope a súugëh iñi ëldúnë, te yen pesa' ëldúnée woteh a júb, pokoh Koope na, yen ham affi yen,

¹³ yen sehaaloh bisa yaakaaru yen, nay sosle keeññi yen ɗa. Bisi baa daa bisa nay aye Yéésú-Kiristaa a ndam ra, ɗi fa daa Koope fi gaana lahuu yen na sëmlë' yen ɗa.

¹⁴ Di yera'te ñiiní tosi yen tooññi yen béeb a ladli yen, yen hen bëewí sah-sah, bëewí saamuun paŋ yin wun kep.

¹⁵ Iña wad' fuu yëedíɗ bëy íl jaŋaa ra, daa wa yah. Lah wonee wa a sañ-sañi mitte, fu on bëewë në síkírúu rë rë doole, fu won affi yee kaa'uu síkírëhú rë. Ow ñanay roo heef !

3

Yee wad' bëyi gémpé rë

¹ Lah nérsé bëewë biti wa warutee on njíttí gina cér a bëewë homru nguur ka ra, wa ñee iña na wonu wa ra, wa caŋ paŋ yii hente wun béeb.

² Wa henun bëewí në wëníh bos sun ow a bëewí në íñih. Wa henun bëewí sosute ní sos, wa lah jaamma a bëewë béeb.

³ Yee tah mi won ɗo yii baa ra bitih : filoon, yeni wa béeb húmú lahuy af. Yen húmú kaa'uute ñee yee won Koope ra, yen húmú bëewí múuyú múuyë. Fah-neb a pagad' bos húmú hampe yen ñaam, yen na tasuu pesa' bos nuf a

iñaan. Ow húmú fahaay yen tík íl te yen húmú fahuuy tíkëntë' íl.

⁴ Ndaa, teeḅa' Koope fa daa Sëmlëhí yen naa'i keeñi a ḁee faha' ri ḁëewë rë,

⁵ ḁi sëmlë'té yen. Biti yen pagu yii júḁpé neh daa tah ḁi sëmlë' yen ; ḁi yérem yen yérmë. Di hosse keeñi yen sëmlë'té yen. Di ñeya' doolii Ruuh-Peseḅ yen límëetúté, yen lahute pes has.

⁶ Di ñeya'te Yéesú-Kiristaa Sëmlëhí yen na, líífidté yen a Ruuhi baaha.

⁷ Daaha, on-Koo tahte ḁi haba'te yen ḁëewí júḁtuté nda yen hen ḁëewí ay haal pesa na ḁúméh, na yaakaaru yen ḁa.

⁸ Woni wëerté abah, te mi faha'te bití fu baat naa wone nda ḁëewë gému Koope ra ḁééḅ pokoh paḅ yin wun. Baa daa yee wun te lahíḁ ḁëewë ḁééḅ njiriñ ra.

⁹ Ndaa nék, lah moytee capa' pëtíh, cabi tii yi caacci mínéh ḁúm, íñë' a taasanta' di yii lenke Kootaa. Yaa ḁééḅ wonni lahay af a lúk te lahay njiriñ.

¹⁰ Lah ḁëyí fí yéḅké bití hom ḁaralsa' ḁëewë ḁaralḁoo raa, lah ḁëeké rí fu won ḁii na. Di kaa' síkírëhú rëe, fú ḁëekëet ḁí fú wonaat ḁii na. Di kaa' síkírëhú waali ana fa raa nék, lah ḁúhé ḁii na ní lan,

¹¹ te fu yúh bití ḁëyí baa helte waala wun ḁa te bakaadḁi teeḅa'te bití daan wadte ri, te daa ri koma' ri aḁi.

Unna mülle' líkín Pool Tít ḁë

¹² So' nék, may roo wola' Artemaas mbée Tísík. Ow di waa na ac ḁaa, lah yípée ac fu ḁeef so' Nikopolis, may líyée në.

¹³ Lah page yii mín fú bééβ sun fi baaba na suu Senaas fi layoha a Apolos ra, fu waayid' wa níi iñi wa bééβ mit.

¹⁴ Koy-yaayya filib ngémë bal warutee pokoh pañ yin wun nda wa lah njiriñ, wa dímlë' bëewë homu coono ra.

¹⁵ Bëewë funi wa homu dee ra bééβ na woduu ro. Lah wodee kooyyee ke yen filib ngémë. Koope líhë rën mal bééβ !

Séréel Ndút: Unni Koope

Ndut: Séréel Ndút: Unni Koope (New Testament+)

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2020-11-20

PDF generated using Haiola and XeLaTeX on 28 Dec 2024 from source files dated 29 Jan 2022

a3a1238b-9393-5875-a4c5-1d3f38537bfe